

## Was die nitt all erauskrieh

Vor e paar Daach hott mich de Schorsch oogerufe. Hosde dess gelese, frächder mich, doo hawwe se erauskrieh, dasses in de Nochberschoft vunn unserne Sunn e onner Sunn gewwe dut, die siwwe Planete hott, all su gruß wie unser Erd. Unn dasse glaawe, uff dem oone odder onnern vunn dene kennts Lewe gewwe. Doo werrds nitt long dauern unn die versuche, dene doo drauße e Lichtzeiche ze gewwe: Hallo, mir sinn doo! Seid ihr aach doo? Awwer ess dut halt dauern, bis die Noochrischd dort ookumme dut.

Isch saach: Ja, was die nitt all erauskrieh. Dess mussde derr emol vorstelle: Die onner Sunn iss su weit eweck, dass, wonn die jetzt die Lichtsignale losschicke, die nooch verrzisch Johr dort ookumme, unn donn misse die dort drauße die de erst emol entziffern. Wenn donn ooner vunn dene zurickschreiwte dut, dauerts widder verrzisch Johr, bis die Antwort bei uns ookimmt.

No, seet de Schorsch, doo will isch emol gesponnd soi, was die schreiwte. Awwer warum mächt merr donn su ebbes? Wärs nitt besser, merr deet dess Geld in unsern Planet Erd stecke, hier wisse merr was merr hawwe.

Isch saach: No ja, merr will halt wisse, obs uff su emm Planet Lewe gibt, unn wenn merr Antwort krieh waaß merr, dasses dort Lewe mett Intelligenz gewwe dut.

De Schorsch hott gemurmeld. Was die nitt all erauskrieh. Unn die kriehn als merr eraus, die Spezialisde mett ihrne Maschine

No, was donn?, frooch isch, awwer babbel e bissi lauder.

De Schorsch hott ins Telefon gekrische. Doo hawwe doch su e paar Leit weesche unserm Parre nooch Limborch geschriwte unn hawwe gemoont, weilse ihrn Nome nitt genennt hawwe, deet merr nitt erauskrieh, wers war. Awwer die in Limborch wolle jetzt wisse, wer die Schmierfinke sinn, die die Brief geschriwte hawwe. Unn donn wolle die dene Anonyme schreiwte, dasse dess doch losse solle. Weil jeder soll gleich soin Nome drunner setze, doo deet dess nitt su vill Arwett mache dess eraus ze krieh.

Isch habb gefroochd: Schorsch, wie krieh merr donn su ebbes eraus?

De Schorsch immer noch ze laut: Ich habbs gelese. Wer heit enn anonyme Brief schreibt, hott schunn e paar Mol enn Brief mett soiner Unnerschrift fortgeschickt. Unn dessdeweesche kann ooner die Schreibmaschin verdausche odder de Computer wechsele su vill wie er will, die Art ze schreiwte konner nitt versteckele. Dess iss su ähnlich, als wennde enn Bekonnde vunn weidem vunn hinne sehe dust, du waaßt gons schnell wers iss, weil soin Gong dut enn verrode. Unn su isses aach mett su emm anonyme Brief, die Gongart in emm Brief, die merr Stil nenne dut, dut de Schreiwte verrode.

Isch druff: Doodeferr brauche die awwer enn Haufe Leit in Limborch, odder?

Dess isses joo, rieht de Schorsch ins Telefon, nor oo Fraa. Die leescht dess anonyme Schreiwte uff su e Gerät wie enn Kopierer, den hatt de Tebartz noch oogeschaafd. Dess Gerät hott zwaa Bildscherm, doo sieht merr links den neie Brief unn rechts rase ooner nooch emm onnern alde vorbei. Unn uff oomol mächts Kling, die Maschin hält still unn die Fraa sieht die Iwweroistimmung unn waaß, wer den anonyme Brief geschriwte hott. Isch habb gestaunt. Ei dess iss joo wie mett dene Fingerabdrück, was merr monschmol im Fernseh sehe dut.

Genau, seet de Schorsch, genau su isses.

Isch saach: Was die nitt all erauskrieh. Doo werrds su babbisch Zeisch wie anonyme Briefe bald nimmi gewwe.

Eiern Honnes